

Alofaaga o le a'oga 'Afega o le Alofa' i le Aso o Tina

O le tausaga e 2014 na faavae ai i le na o tamaiti o se aiga, a o lenei ua lata i le 80 le aofa'i.

O le a'oga o se taulagalaga a le tamaitai faia'oga o Patisepa Tuafuti i totonu lava o lona aiga i Afega, a o lenei ua tatala atu le avanoa i isi fo'i fanau a le nuu, e aofia ai ma nuu tuaoi ane.

Faatupeina lava le galuega e le aiga sa Vaitimu. Molimauina foi le opogi a le nuu i lenei atina'e.

O la latou faamanuiaga lenei mo le Aso o Tina i o latou aiga I Niu Sila ma Samoa foi. Avea foi la latou faamanuia e faamanuia atu ai le OLA mo ana pa'aga tina uma. Manuia tele le Aso. Maua nisi Aso Fiafia faaopopo i le lumana'i.



Laau fou o le faato'aga: Le tama o Aliioaiga Vao, 3 tausaga, poto e tauloto le sivatau a le Manu Samoa, lelei le tautala, lelei le pese ma le siva. Poto e faata'ita'i taga a se matai o loo lauga. Lea o loo usu le pese mo tina, ae tapua'i le isi vaega.

Sili aoao Corina Vai i le sikolasipi Samoa 2015


Ua fa'alauiloa aloa'ia nei alo ma fanau na manuia i su'ega o le Sikolasipi NCEA i le tausaga na te'a nei.

O le na sili aoao i le mata'upu o le Gagana Samoa, o le tamaitai'i lea o Corina Vai, 18 tausaga mai i le A'oga maua'uga o McAuley High School i Aukilani. O Corina o le alo o le Susuga i le ali'i a'oa'o o Kitona Nanai Vai o Matautu Falelatai, ma le faletua ia Quakie Lee Vai o le afio'aga o Solosolo.

Na fanau o ia i Samoa ma malaga mai ai i Niu Sila i le tausaga e 1999. O lo'o ia fuafua e alu i le kuata fou i le lunivesite o Aukilani e 'ave le Gagana Samoa, ma su'e sona fa'a'ailoga i mataupu tau ta'aloga.

Ina ua fesiligia i le ala o le fa'amalosia o lona iloa i la tatou gagana, fai mai a ia, 'O le tautala lava i le fa'asamoa i le fale, mea e fai i le A'oga Aso Sa, Autalavou ma le Ekalesia. Sau loa i McAuley, e matua tele le isi fesoasoani na maua mai ai.

"Na ou lauga i felafolafoa'iga a kolisi (Debates), o le 'ava o le feiloa'iga i le so'o a McAuley ma le autalavou a Manase, aemaise o mea e fai a le a'oga. E tele



I LE TUMUTUMU: Le tama'ita'i o Corina Vai na sili aoao i le sikolasipi Samoa 2015, ma lona faia'oga le tofa ia Tauanuu Perenise Tapu, A'oga Maua'uga Teine McAuley

Iu'itau na tu'u mai e le faia'oga ia i matou, ae taumafai vaivai lava, ma fa'amoemoe i le Atua."

Atonu o le fe'au foi lea mo fanau Samoa i nei aso. Ia manatua le gagana, ne'i vale tu'ulima le ta aganu'u. TSP

*Ripoti o le Vaiaso:***Mana'omia vave fesoasoani i isi mana'oga o fanau**

Ua mana'omia vave se gaioiga a le malo e tuumama ai le avega o loo feagai ma faia'oga i lenei taimi. O le avega e mafua i le le 'a'u o le faasoa tauseleni, e taliina ai faaletonu tau le tino ma le mafaufau maloloina o fanau. Ua avega lea ma mafuaaga ua le mafai ai ona totogi ni faigaluega e a latou le tiute, ae omia ai faia'oga i le ava lea.

O se avega faaopoopo lea i faia'oga e le o sa latou matafaioi le tino ma le mafaufau, ma afaina ai fo'i ma le faatinoga o la latou pitolaau.

Fai mai le tama'ita'i sui pule o Lisa Heald o Kalaiesetete, e iloga le afaina o fanau i totonu o le aai ona o aafiaga o mafui'e sa feagai ai; e mautinoa e to'atele ua afaina le faalogo, lagona ma le mafaufau ona o mea sa tutupu.

Ae le fesoasoani le tatipi o tupe e le malo mo na tautua, e pei ona faailoa mai se fuafuaga faapea e le i mamao atu. I le taimi nei o loo ua tuu igoa o fanau i le lisi faatalitali talu ai le le lava o le aufaigaluega.

E lagolagoina e le pule a Linwood Avenue, Gerard Direen, le faameo a Heald. Molimau Direen, e 22 vaiaso e faatali ai se tamaitiiti mafatia i lona avanoa e vaai ai se foma'i.

O isi tautua tuma'oti e pei o le Koluse Mumu sa lave i le tele o tausaga, a o lea ua taofia ina ua faamutaina le fesoasoani tautupe a le malo sa ave i ai.

E le na o Kalaiesetete, a o se mana'oga e aafia uma ai le salafa o le atunuu. A o faasolo le tipi a le malo i



E tusa ma se 73,500 le aofa'i o fanau e le a'o'oga i se aso se tasi, a faatele i le aofa'i o aso a'oga i le tausaga ona maua lea o se ata i le mafaufau. Tele o faanoi o fanau i le le a'o'oga o le ma'i. Molimau su'esu'ega, e maua luga numera o fanau Pasefika ma Maori e mama'i ma misi ai le a'oga. Soo se aso ma'i, o se toese lena mai i ausiga manuia—tamaitiiti ma le a'oga.

vaega na, ae fesaga'i faia'oga ma tamaiti e ulufale mai ma taliga e pepē ma amio e mana'omia ai le iloiloga a se foma'i o le mafaufau.

E faitau selau ma selau i latou e ulufale ma ma'i o le tino, ma taofia ai so latou mafaia e ausia tapulaa. O nisi ma'i e faigofie ona togafiti ae afai e leai se mea e fai i ai, e avega lena ma se faafitauli tumau, e iloga ona aafia ai lona lumana'i—aafia ai isi tamaiti ma a'oga.

O le leai o se iloiloga vave e fai i ai e mafua ai ona faauiga sese e le faia'oga amio a nisi fanau. Faapea e ulavale a o le mafuaaga tonu o le poloka o taliga. Faapea o le le faalogo, ae mafua ona o faafitauli tau le aiga.

E leai se mea a a'oga e mafai pe a le lava le faasoa tautupe mo lea vaega taua, e fesoota'i tonu i se a'oga manuia ma fiafia mo fanau. E leai fo'i se mea a a'oga e mafai i fale malulu e mafua ai le tele o ma'i e o atu ma le fanau i le a'oga.

OTOOTOGA**Faamalosi le vala'au mo ni sui faatutu**

Ua toe faaopoopo mai le valaau mo le faatutuina o ni sui tauva i le sailiga o ni sui o komiti faafoe mo a'oga. O le vala'au e sau lea mai le asosi o sui o komiti faafoe a le atunuu. E lima vaiaso ua fuafuaina mo lea faamoemoe, se'ia faagata i le aso 20 o Me. Ona amata lea o faiga palota e aulia le aso 3 o Iuni, a o le aso 9 o Iuni e faalauiloa ai suafa o e ua filifilia. E 13,000 le aofa'i o ni sui mai matua o loo fia maua, e faatumuina avanoa mo ni komiti se 2500. O le sini, e fia maua se paleni i sui o le komiti, e atagia ai le vaevaega o fanau a'oga.

Faamamafa e le WelTec le enisinia

O se tala fiafia mo le a'oga a le WelTec i Ueligitone le ausia o se faamau sili o le aofa'i o fanau ua lesitala o latou igoa i tusipasi tau le enisinia. E 255 le aofa'i o i latou ua tusia e aveina le tusipasi Tipiloma ma le tikeri i lea lava mataupu. E 33 i latou o loo aveina le polokalame amata ma e mautinoa o le a see a'e i luga e ave le Tipiloma pe a iu manuia le polokalame. Na faailoa se lagona o le alii pulenuu o Hutt, Ray Wallace, i lenei tala fiafia. E manatu o se tali lea a Hutt i le oge enisinia o le maketi faigaluega.

Valaau mo se fesoasoani

Ua faailoa se vala'au mo le opogiina o uso faato'a iu mai i toleniga faafaia'oga, ina ua lipotia le iu mai ae leai ni avanoa mo latou i totonu o le fosi faigaluega. E iai nisi ua atoa le tolu i le fa tausaga o loo tau saili pea ni avanoa tumau talu ona iu. To'atele o loo galulue faavaitaimi e fai ma sui o faia'oga ae lei ofoina lava i ai ni avanoa tumau e na a'oga. O nisi avanoa ofoina e le fetauti ma mataupu sa a'oa'oina ai i kolisi faafaia'oga. E taofi le NZEI ua tataua ona fai se fuafuaga a le matagaluega i lenei lape faalegaluega.

Faaalu tupe a faia'oga

O se su'esu'ega a le NZEI sa faia i faia'oga e 250 na iloa ai le to'atele o faia'oga latou te faaalu a latou tupe mo a latou tamaiti a'oga. E tusa ma se \$200 i le \$500 a le faia'oga (fua faatatau) e faaaluina e faatau ai ni alaga'oa, o ni api e oo lava i le fafagaina o nisi e leai ni mea'ai e avatua i aiga. E le ofo se tasi pe afai o loo faaalu e se faia'oga se \$1000 pe sili atu mo ana tamaiti i le tausaga.

Salalau atu i le lalolagi le tapunia o Avele

Ua logo i tulimanu o le lalolagi le tala avatu i le faaiuga a le malo o Samoa e tapuni se tasi o a'oga aupito matua a le atunuu.

I lena vaiaso ua mavae na molimoli atu ai le tala i luga o alaata o TV a Niu Sila, leitio ma nusipepa fo'i. E le ta'ua le Facebook ma isi ala o sootaga faasalalau ua mafai ona maimoa i ai le lalolagi faitau.

E faate'ia le faafofoga a Samoa i vasā i lenei fa'aaliga, aemaise i latou sa a'o'oga i lenei a'oga, ma o loo tautua pea e ala i lana asosi o tama a'oga tuai. Ua faailoa le mafua'aga,



o le amio le pulea o sina pasene o ana tamaiti a'oga. O tuua'iga e aofia ai ni fe'au taufaamata'u i tamaiti o se tasi a'oga—aofia ai ma faia'oga.

O se fuafuaga faaletumau, ae o loo taumate pea le iuga. Ua atoa le 90 tausaga o Avele, sa faamanatu i le 2014.

*Faasoa o le Vaiaso:***O le falea’oga a Samoa o le nuu atoa**

O le falea’oga a Samoa o le nuu atoa. Ua avea le nuu ma se ofaga e faafailele ai le olaga faa-Kerisiano ma le atamai faaleaganuu. Faatusa e le alii katinale o Pio Taofinuu i se faaipoipoga ua fetai; o le mau faalenuu ma le mau faalelotu, o na ua faavae ai le galuega a’oa’o i le atamai ma le amio. O le fesili, O a mai la le falea’oga o Samoa? Poo tumau pea le anofale sa iloa ai?

O se tasi o uiga mata’ina faaSamoa mai lava i anamua o le tausī faatasi o fanau. Poo totonu o aiga le lotu poo le nuu e fai faatasi. Pe faatonu e faife’au, faia’oga e le afaina lea i le finagalo o se matua e ana le tamaitiiti. Auā sa malosi le lagona o lou atalii o lo’u foi; sa tasi le lotu tasi le manatu, o le ta’uleleia ma le maopoopoga o le tino e tasi.

Sa mafai i lena malosi soofaatasi ona taofiofi lena maopoopoga o le nuu. Auā o le malosiaga lena sa tu mati’e ai le pule a alii ma faipule, na mafua ai ona mamalu ma faaaloaloga pulega; ma faapea ona mamana ai le a’oa’i atu a matua, failotu i la latou galuega faatonu. Sa usita’i fanau i matua auā sa matata’u i le pule lea e mamalu ifo i o latou luga ma mea uma lava; sa ava ma faaaloalo auā o le tulafono lena sa tausī ai le va fealoa’i e le fesiligia e se isi. Sa faalogo auā sa mafuta i aso uma. O le mea o loo fai i le isi nuu o loo tupu foi i le nuu tuaoi, le itumalo, le motu le malo atoa.

Oo mai i lenei soloa’iga o tupulaga ma le taimi, ua tatou molimauina faailoga o le fai ifo. Ua silafia lava le mafuaaga, o matagi o suiga. O matagi fou e foliga ua lofia ai lagona tuai ma suia i lagona ese sa lei masani ai. Ua tuua’iina e nisi le pule a le Temokalasi. Ua mafua ai le manatu ifo ae le manatu atu, ua sui malie ai lagona sa mua’i iai.

Faaopoopo i ai le lu’i mata’utia mai aganuu fou faaletalavou mai fafo, o loo ua finau ma tu masani i le maloina o lotu ma mafaufau o le autalavou. O na mai fafo ua latou fa’aaoga aupega malolosi a nei taimi e pei o le initaneti e faato’ilalo ai; o le iuga, o aganuu o sauaga ua ofi mai, lea ua tatou vaaia le liutino mai i soligatulafono e tele e faia e talavou, tama ma teine—ua tusa pau.

I se taimi e le’i leva atu na asia ai Samoa e ni saienitisi o mataupu taumalo, latou te fia iloa pe mafua i se a le filemu o Samoa ae leai ni leoleo i nuu ma afioaga. O le tali, auā o tagata uma

lava o leoleo o le nuu. Leoleo le filemu, leoleo tuaoi, leoleo fanau uma pei se aiga se tasi. Sa avea le ta’uleleia ma viiga o aiga, nuu, sa teu faapelepele i le ioimata o soo sana tamafanau.

Lenei ua amata ona solo le pa, fai mai failauga e le solo, molimau le mau mea ua tutupu.

I le lipoti o le mea na tupu, O ai na manatu e fai e se tasi se lafoga faapea i totonu o le atunuu, i se aganuu e mamafi le ta’u i le upu feagaiga? E le pine o se a’oga lea a lē na ia tusia le fe’au mai le vaega a le Isis. Ae atagia ai le moni o le mata’utia o suiga i mafaufau ma lotu o tupulaga i nei taimi. E moni Tuia, tama tuai, o le pala’ai le mea lena. A o le fesili, Pe faamata ua toe iloa e fanau i nei aso le uiga to’ilalo o le upu pe a fasi e se tama se teine? Taatia le fa’aaoga o se aupega? (Pe le o lena e atagia ai sauaga i tina i mea ma’ai o loo tutupu pea i Samoa?)

E atagia ai fo’i le tasi mea moni, le tula’i mai o se ava telē ua faasolo ina faateteleina i le va o matua ma fanau, va o tupulaga matutua ma tupulaga laiti. Va i lagona ma manatu ma mafaufauga ona o le sa’olotoga tuutele i filifiliga ua tafili saunoa ai fanau. Le tula’i mai o ni aganuu-faiganuu se lua - o lena a talavou ma le isi a le aumatutua. O le tasi e fa’aaliali ma taulagi ma le isi e ailililo ae fua mai i amioga sauā ma le fouvale.

O le ava lena na tuua talu mai a’oga a le faife’au, le nuu i lana faataulele’a ma le aualuma, lenei ua faatumu e taaloga ma le Facebook ma isi mea e tele.

E pei lava o soo se ava i le olaga, e tatou ona faatumu; a tuufua umi se fanua po o se fale e toe fo’i atu ua nonofo ai isi. Faapena le ava o le lafoa’i o fanau ona o mea e pupū i ai lotu o e matutua, e le pine e faatumu e fanau i se taimi vave. Sa iai taimi o mafutaga afiafi a aiga—matua ma le fanau e lei mamao atu; ua molimauina se suiga tele i lena masani—matua ua aga’i i nisi faatautu, fanau e aga’i i le auala. Ona moni lea le faataoto a le Alii i le fale tuufua, e iu ina toe fo’i atu i ai le agaga leaga sa nofo ai ma isi agaga leaga. Ona sili lea ona leaga o le iuga i lona amataga (Mataio 12.43-45).

“mafaufauga o le vaiaso”

Ona sili ai lea ona leaga le tulaga o lea tagata i lo le tulaga muamua. E faapea foi ona fai i lenei tupulaga leaga. *Iesu Faaola*

*Tulimanu a Pōpa:***Gaualofa ia Avele, faia’oga faimea’ai, ausiga le suia & Donald Trump**

Malo le soifua manuia, viia le agalelei fai pea o lo tatou Tapa’au Sili.

Tele mea sa tutupu ma o le a tutupu i lo tatou lotoifale a’oga. Tala muamua e te’i ai le faalogo o lena i le tapunia o Avele. Na o le gaualofa i nai uso sa aoga i lenei a’oga, e pei lava o le upu, e muliga le tiga i le lavea i le lakapi i le manu’a o le lotu pe a satia le ta’uleleia o se mea e faapelepele i ai. Tatau ona pasi se tulafono e molia ai matua ma pulenuu o afioaga e ana fanau ia. O le tali lea o le faafitauli, saunoa Pole.


Faailoa le molimau a se uso faia’oga i le mea o loo tupu i lana vasega. E o mai fanau e leai ni se’evae, e fetalei ma fia momoe ma fia aai i le taeao. O lana mea ua fai o le faatau o se falaoa ma se pata pinati e fafaga ai. Faapea na o malo vaivai e maua ai, ae leai, e maua lava i lalo o le isu o le faigamalo lea e tula’i mai. Pau lea, afai ua ave le tupe i le kasino poo se maliu, ona tuua’i pea lea o matua e ana latou fanau. Ua tuua’i soo foi le malo i le faatamala o isi.

E tele mea ou te fia talanoa ai e faatautu i le faasoa o le vaiaso. Pau lea, na o se tomanatu i le saosaoa tele o suiga e mafua ina ua tatala le pusa a Panetora. Ou te faatusa le Initaneti o le ki ua na talaina le pusa o faanoanoaga. E le teena, e tele itu lelei o le fesoota’i ma le lalolagi lautele, e malamalama ai i isi uso a tagata ma o latou siosiomaga.

Ae mata’utia foi itu faale lelei. O lena lava ua silafia.

E 25 ni faia’oga a le iunivesite o Waikato ua vaea, ma e le na’o sea a’oga o loo aafia, tele isi ua faamalalo le afaigaluega, ma isi o loo fuafua talu le tulaga faaletonu tauseleni. Talu ai nei na faailoa ai le sauni o le malo e tapuni le PEC i Manukau. Ana le lave le minisita o Atumotu, ua mafua ai ona toe faaauau. Peitai o loo tauilo pea se lumana’i o lea tautua aoga e oo mai i lenei taimi.

Fautuaga a Pole ma Papa, afai ua maua le galuega faamaoni i ai, o nei aso ua leaga. Manatua o loo iai ni vaega faaupufai o loo moemiti i le aso e pulea ai a’oga a le atunuu e ni pulega tuma’oti. I lalo o sea pulega fou e ono le toe iai ni aso ma’i (ta’u e isi o aso malolo faaopoopo). ***Faaauau i le itulau mulimuli***



O le fu'a o le alofa na agiagia i luga o le pulu

Tala mo le Aso o Tina

I luga o le papa i se si'ufanua i tafatafa o le sami i se nuu tu matafaga i le motu o Savaii na saofa'i ai se tama'ita'i ma mata'i le tafailagi. Na o ia lava o lo'o nofonofa ai ma leiloa ai i ona mafauauga. Ua lata i le tauafiafi ma ua amata ona tagi alise.

I luga tonu o le papa se gatae mafalā o lo ua tauluulu i ona lau sasama ma fua mumu sesega. Na o ni segavao se lua na tuai mai o lo'o tau saili ni toega suamalie, a o isi ua leva ona toe fo'i i o latou aiga. Ua leva fo'i ona sau le tama'ita'i ma nofonofa i luga o le papa, ua fia alu fo'i ia i lo latou fale ae e le mafai. O lo'o fa'atali lona to'alua o lo'o alu e fagota i tua'au.

O le tala a le tamaloa, ia vave alu atu i le matāfaga ma le ola fagota e fa'atali lona a'e mai. Ma o se tu lea ua masani ai le tama'ita'i i Aso Tofi uma; e le faia i se fa'atauana ae fai i lona loto malie.

Ua atoa le fitu tausaga o la laua mafutaga. I lona fitu tausaga, e le i suia i sina iota lona alofa ma le fa'amaoni i le na tauto i ai. O lona tautoga na faia lava i lalo o le pulu aoa i luma o le faleoloa o Emelio i le sisigafu'a o le 1970.

Ia te ia, so'o se taimi e fana'e ai le tai, pe fotu mai fua o le gatae, o ni fa'aologa ia e faamanatu i lona mafauau i la la ulua'i feiloa'iga ma lona to'alua i lona taeao. O foliga fiafia o le alii na fa'atalofa mai ma ta'u mai lona igoa, e nofo i Taufusi, e ta'ita'i i la latou a'oga. E momoe lelei lona lauulu i le faguga'o, o lona ie sesega mumu ma le ofutino samasama sa fai.

A o ia o le teine mai le motu tele, o le ulua'i taimi lea ua mafai ai ona auai mai i se sisiga fu'a fa'atasi ma isi teine ma tama o la latou a'oga. Sa fa'amautu i latou i se a'oga nofotumau i Apia, ma tapena mai ai mo le fa'amoemoe i lea taeao.

E fou mea uma i lana va'ai. E moni sa ia asia muamua Apia ma ona matua, ae e le i va'ai lava i se tumu uiga ese fa'apea e pei ona iai lenei taeao. E fou le va'aiga, e fou foliga, a ua sili ona fou foliga o Jack i lo nisi lava mea na va'ai muamua i ai. Ona pau lava lea o le fu'a ua agiagia nei i lona mafauau a o alu le savali aga'i i tai i Mulinuu. Na musumusu atu nei i si ana uo o Sina ma atili ai ona malosi lana filifiliga ina ua fa'apea mai Sina, "Se 'aue le fefe, afai o lou tofi lea, va'ai ne'i e misia." Na fo'i mai le savali a a'oga mai Mulinuu ma maua ai lava ma le tonu, o laua ma Jack ua fia avea ma tino e tasi.

Ae iai le mea ua tupu, ua fia auai fo'i ma Sina ia i le koneseti. E le i faigata lona mea ia Jack, e to'atele ana uo o lo'o fia avea ma fitafita i lenei tala fou a Talitimu ua fa'afotu. Ona iai lea o John, o le uo a Jack, o ia lea ua filifilia e soaina le tama'ita'i o Sina. O luma lava o le faleoloa o Emelio i Matafele na fai ai a latou tautoga o le alofa

fa'amaoni. O pati o fa'aipoipoga na faia lava i lea afiafi i le faletafao a le Apolo i Taufusi. O le 1970 lona fa'ato'a 16 ona tausaga. Ma talu mai lona ulua'i feiloa'iga ua atoa nei le fitu tausaga, e tele ni mea ua na iloina e uiga ia Jack ma lona si'osi'omaga.

Amata mai lava i lona taeao muamua na te'i a'e ai i le aiga o Jack i Taufusi, na ia mautinoa ai e ese lava tala o evaga i le po ese tala o le taeao pe a tafi le puao, ma iloa manino atu foliga o mea moni e le suia.

Muamua, na te'i lana fa'alogi ina ua tatala mai le faitoto'a e le tina o Jack ma fa'apea mai i le gagana mamafa, "Makau, ala i luga, a o ai lega keige ua e aumaia i le fale?"

Kafepe pe a fa'aolafia mai lou kamā mai Kukuila, e le iloa le mea e fai ia oe!"

Na fa'aauau le pi a le fafine, "Ia, kalofa e ia ke oe kama'ika'i, 'ai o popole ou makua poo fea o e iai. Leaga e ke le iloa le isi igoa o le alii lega, o Kau ma oe le faalekoguga." Ma sake ai lava le fafine i le vaveao.

O le fa'asa'oga muamua lona, e le o Jack, a o Matau Tauma'oelefa'aletonuga. O Jack o lona igoa vala'au i aso uma (A ita lona tinafai ona vala'au lea o Makau).

Fa'asa'oga lona lua, e le i a'oga Jack i se kolisi. E le a'oga i le kolisi lea e mumu o latou ie, ae na savali nanā ai i le savali a le a'oga. O lona uo o John e a'oga ai i le a'oga lea, lea na maua ai lona piitaga, ae e le tau ane ai i se pito lava e tasi.

Fa'asa'oga lona tolu, e le avea e Jack la latou pikiapu, ae sa'o e fai le pikiapu a lo latou aiga, a ua leva ona tu ua leaga. O le tina o Jack o le uso o lona tina; o lona tamā moni o se malini Amerika, ae na tausaga e lona tamā fai, ae e le mafanafana la la mafutaga. Ina ua avatu le mana'o o Rosa ia Jack la te o i Savaii i lona aiga, na talia fiafia e le alii Taufusi.

Na toe taliē Rosa ma lona uo o Sina, ma ia tatalo atu ai i lona uo 'a alofa i ona mata 'aue le tala'ia nei mea i nisi. O Sina ma Ioane (John) ua leva ona malaga atu i Niu Sila. O si ana uo lea e la te fetusia'i ma maua mai ai ana tupe ma fa'amomoli.

Fai mai Sina e faigaluega lona to'alua i le falemeli, o le pisi ia o le galuega ma i lona tusi mulimuli fai mai ua tofia John e avea ma fomeni.

O le manaia ia o le olaga i Niu Sila e ese lava ma le olaga i Samoa. E tele tupe, e tele fo'i galuega. Na ia folafola mai fo'i e mafai e John ona su'e se avanoa mo lona uo o "Jack" pe afai ae o'o la la malaga. Ua uma ona taupule mea uma e tama'ita'i e aunoa ma le iloina e o la ta'ito'alua.

O Jack le 'tama Apia' ua avea nei ma taule'ale'a alofagia i le nu'u o le tama'ita'i o Rosa i le motu i Savaii. E to'aga i le fale o matai tainane e le iloa tautu se 'ava pe fifi se taufolo. E alu i faiva o taulele'a tainane e le



Taumeasina

Ua latou tanumia Taumeasina le nofoaga sa nanā ai a ta oa fa'atauva'a na fa'aputu mai i ai e peau o ta mo'omo'oga o atigi figota mamate sa so'oso'o e nai ou tamatamailima e avea ma fa'asolo o o ta fa'amoemoega.

Ua latou tanu le matāfaga le mata'aga o ou manatunatuga sa fetaia'i ai le vaitafe o Taumeasina ma le sami ma feiloa'i fiafia ai i lo ta alasopo papa'u sa uia a o ta aga'i atu ma a ta oloa fa'atauva'a ma o ta foliga fiafia e fa'atau ia Eki.

Ua latou lepeti lo ta ma'a fa'amanatu e manatua ai le loto maulalo ma le alofa le nofoaga sa maua ai e se tinamatua ma sana tama le fa'afiafiaina o le loto ona o se atigi figota le taualoa ua avea o se mea taua fa'aopoopo i la ta'ua rosario o mo'omo'oga.

iloa 'u'u se matatao pe toso le lau upega. Ae na maofa tagata ina ua uma ane le tolu tausaga ua leai se fe'au e le faia e le tama Apia. E iai le fagota i tua'au, na o Siaki ma sina vaega latou te mafai ona fai.

Lea o loo popole ai nei le tama'ita'i, po'o a mai si ona to'alua ua alu le aso. E le i leva ae va'aia loa le va'aalo lanu mumu ua aga'i mai fa'atasi ma le tai fana'e. Na tuta i le papa'u ona oso lea i lalo o le alii ma toso mai le va'a i uta i le matafaga.

"Tautai a'e! E a mai le faiva? Ua ou popole po ua 'ai oe e se malie!" o le tala lea a Rosa ma savali atu ma le ola e matamata i le faiva.

"Oga pau lava e maguia le aso," o le upu lea a le alii ma tau'ai poge ma alogo lapopo'a i totonu o le ola. Ua tumu le ola; ua tui isi i'a i le matatao. "Ta o loa, e iai le mea lea ou te fia talanoa atu ai," o le upu lea a Rosa ma la savavali fa'atasi atu loa i gā'uta.

Na taunuu i le fale a o lo'o fai le lotu a le toea'ina ma le loomatua. Atonu na lagona mai e le toeaina le mamafa o le palasi a le ola ua tumu i i'a, ona fa'apea lea lona tatalo, "Iesu, alofa atu ia Siaki ta'ita'i mai, ua tele lona aogā i lenei aiga. Amene."

Sponsored by Evaleon Books

O LOU TALA SAMOA HISTORY

"Me i mea aua ua galo"



ME 8-14

08

1969 Pasi e le malo lana faamau faailoga fou

1967 Tofia ulua'i leoleo tama'ita'i e to'aono: Mary Theresa Pavitt, Anastasia Carolyn Schmidt, Annie Elaine Laumea, Theresa Tavai, Katalina Ieremia, Mele Fanene Vaeau

1922 Aso fanau, Tupua Tamasese Lealofi le IV

09

1961 Pelepesite: Iagolago e Samoa le Tuto'atasi

1881 Maliu misionare Toga Panepasa Ahongalu

1838 Faavae ulua'i falesa LMS i Pago Pago

10

2012 Ulufale Samoa sui 155 i le WTO (Maketi Lalolagi)

11

2007 Tuua le malo e Malietoa Tanumafili le II

1966 Pa le vaa Polenisia DC3 i le 'ea maliliu ai auvaa e to'atolu

1964 Amata le tanuga o le lumafale o Apia, Eleele Fou; tanu ai toega o vaatau—afa 1889

13

1915 Fai e Lokeni le poloaiga e faasa ai le tafaovale; 30 seleni faasalaga

Faamavae: 27 Aperila 2016
Leota Leulua'ialii
Leatiogie Ituaui Ale

Faalavelave o le aso 11 Me 1966



Ua atoa nei le 50 tausaga talu ona tupu le ulua'i faalavelave tauvaalele i totonu o le sone femalaga'i a Samoa. O le vaalele la'upasese a le Polenisia o le igoa 5W-FAB, ituaiga o le Douglas RAD-5, na pa'u a o faia se a'oga faapailate ma maliliu ai ni tagata se to'atolu. O le 10 minute e te'a ai le 6 i le afiafi na tupu ai i luga o le vainuu o Apolima, ina ua mamulu ese le faitoto'a ma lelea atu ma faaleagaina ai le apaapa pito i tua (siusiu). Na maliliu uma i latou sa malaga ai. I faamau o lenei faalavelave e le o tusia ai le mafuaaga tonu; poo le faatamala o le auvaa, po o se faaletonu tau i le fausaga poo se tasi mea. Ae na faato'a tofo le kamupani ma Samoa i se faalavelave sili atu le faigata i le fa tausaga mulimuli ane. Aso 13 Ianuari 1970 na pa'u ai le tasi ana vaa (5W-FAC, malaga 208B) i le sami a o taumafai e alu a'e i luga mai le eleele. E leai se tasi na sao o le 29 o le aupasese, ma le to'atolu o le auvaa. O le malaga sa faamoemoe mo Amerika Samoa. O le faalavelave lata mai o lena o le aso 7 o Ianuari 1997, Malaga 211 mai Pago Pago i Apia. Na taumafai aliivaa i se alavaa puupuu ona o le leaga o le tau ae tupu ai le faalavelave. I le tumutumu o Vaea na tofu i ai ma feoti ai se to'alua o le pasese e to'atolu, ma se to'atasi o alii pailate e to'alua. Ua tali atoa nei se 20 tausaga.

- Wikipedia

ME I LETALA FAASOLO O NIU SILA

07 Me 1856. Avea Henry Sewell ma ulua'i palemia a Niu Sila, umi o lana pulega, 14 aso. 8 Me 1970. Numera #1 le pese Cheryl Moana Marie i Niu Sila. 9 Me 1907. Lolomi le ulua'i tusia'oga School Journal. 9 Me 1945. A'e malo le taua, faailoga e Niu Sila. 10 Me 1897. Avea Ethel Benjamin ma ulua'i loia tama'ita'i galue i Niu Sila. 13 Me 1995. Malo Niu Sila i le Ipu a Amerika, tuugavaa failā. - NZ History

NIUPAC PUBLICATION

Email: evaleon.books@gmail.com
Phone: (09) 269-6186
Postal: PO Box 43122
Mangere Town Centre, AUK 2153

All rights reserved. This bulletin and its content is protected by copyright laws of New Zealand and international conventions. Except for educational purposes, any other activity pertaining to its use is prohibited. OLA understands the rights of other copyright holders whose material we use and acknowledge always—apart from our own.

NIUPAC 2011

Editors:

Levi Tavita ~ ltavita8@gmail.com
Muliagatele V. Fetui ~ v.fetui@auckland.ac.nz
Saili Aukuso ~ saili.niupac@gmail.com

EVALEON BOOKS & NIUPAC PUBLISHING



Telefoni (09) 269-6186. Emeli: evaleon.books@gmail.com



Tautua e ala i le gaosia o alaga'oa mo a'oga (tusi mo le a'oa'oina o le faitau i le gagana Samoa, tusi e a'oa'o ai gagana, kalena, posters, yearbooks, brochures). E tautua fo'i i le fa'aliliuga o gagana, ma le tapenaina o ni tusi e fia lomia i so'o se sionara o fatuga.

Sponsors:

New Zealand
Lottery Commission

Evaleon Books &
Niupac Publishing

Wheeler's Books
(NZ)



O LE PENINA

Vaega 4: O MAILEI A SE TAMA'I TAULAGA

E le'i fetēpa'i le aufaatau penina pe āutilo i le penina. Na tautala le tamāloa o lo'o nofo mai tua o le laulau, 'Sa ou tu'u ātu se tau i lenei penina. E manatu lē e āna e le tusa āi la'u tau. Ou te mana'o ia te outou e iloilo lenei—lenei mea, ma aumai ni ā outou ōfo.' Na tepa le tamāloa ia Lino ma fai ātu, 'Manatua, ou te le'i ta'ua i se isi la'u ōfo.'

O le faifa'atau muamua, e foliga pologā ma le ūlu e va'iva'ia, na tepa nei i le penina mo le taimi muamua. Ua a'apa ātu i āi, ua fefulisa'i i le va o lona limamatua ma le tusitagata, ona toe tu'u ātu lea i totonu o le apa.

'Aua le faitauina ā'u i lenei talanoaga,' o lana tala fa'atosotoso lea. 'E leai sa'u ofo e faia. Ou te le mana'o āi. E le o se penina lenei mea—o se mea ese. Ua fa'a'ofu'ofu ōna tama'i laugutu ma āutilo ese.

Lenei o le āvanoa o le faifa'atau lona lua, o se tagata tino iti, e mālū ma tau le lagona lona leo, na ia si'i ā'e i luga le penina, ua su'esu'e ma le fa'aeteete. Ua ia to ā'e se tioata mai lana taga ma autilo āi i le penina ua fa'ateleina lona lapo'a. Ona 'ata lemu lea.

'O penina lelei e fai i le pauta,' o lana upu lea. 'Ou te iloia mea fa'apenei. E fai si galemulemu, e le toe umi ae matafi lona lanu ma mate pe ā o se masina. Va'ai fo'i.' Na ia tu'u ātu le tioāta ia Lino, ma fa'asino i āi lona fa'aāogaga, a o Lino, fa'ato'ā va'ai lava lea i foliga o se penina pe a fa'atelē, ua lē mautonu.

O le faifa'atau lona tolu na tago āne i le penina o i le lima o Lino, ma fa'apea lana tala, 'E fa'i la'u tagata fa'atau e fiafia i mea fa'apenei. Ou te ōfoina ātu le lima selau peso, ae ou te fa'atauina i la'u tagata faitau i se ōno selau pe ā.'

Na a'apa vave ātu Lino ma segi mai le penina i lona lima. Na ia āfifi nei i le fasi laupa'u ma toe tu'u i totonu o lona ofutino.

'O ā'u la o le vale,' o le tala lea a le tamāloa o lo'o nofo mai tua o le laulau. 'Ua ou iloia, ae o le a tumau lava la'u ōfo e tasi le āfe.'



'Ua fa'asesēina ā'u,' o Lino lea. 'E le fa'atauina la'u penina iinei. Ou te ālu, se'i iloia po'o le laumua.'

Ua fetilofa'i le 'aufa'atau penina. Ua latou iloia ua latou fa'afaigatā teisi le ta'aloga; e le pine e ā'ōā'iina i latou i lo latou fa'atamala, ona fa'asalavei vave āne lea o le tamāloa o lo'o i tua o le laulau, 'E mafai ona si'i la'u tau i le āfe lima selau.'

A o Lino ua lē toe fa'atali, ua tu loa ma sa'ili ātu sona āla āga'i i fafo. Na o le magamagagū o si'uleo o tagata o lo'o ia lagona ātu, ua logo i ōna taliga lona ita tele, ua sao ātu i le va o tagata ma ālu ese loa. I ona tua o lo'o mulimuli ātu āi Susana.

Ua malu ifo le āfiāfi, ona saofafa'i lea o tuā'oi i o latou fale lau ma tausasami ā latou panikeke sana e ina'i i fatupi, ma fetufa'i i le 'autū o mea na tutupu i le taeāo. Latou te iloia, o la latou lava faitau, o se penina lelei lenei, ae o le fa'alavelave fo'i e le'i va'ai lava se isi o latou i se penina fa'apea, e lē fesiligia fo'i le popoto o tagata fa'atau penina i lo latou. 'Manatua fo'i,' o le tasi lea, 'e le'i talanoa le 'aufaifa'atau i nei mea. A o lea e taufai malilie uma e leai se aogā o le penina.'

'Ae fa'afefea pe afai ua uma ona fai sa latou tonu?'

'Afai o lona o lona ūiga la ua leva ona fa'aseseina tatou uma, i lenei taimi atoa.'

'Sa sili pe 'ana talia e Lino le āfe lima selau peso,' o le finau lea a isi. 'O se tupe telē lona, na te le'i 'u'uina se tupe telē fa'apena. Pei lava ua so'ona fa'avalea le mafaufau o Lino. Fa'apefea pe a ālu i le laumua ae na te le maua se faifa'atau mo lona penina? Ona toe tu'itino lea a ua lē āogā.'

A o le 'aupolevale ua fa'apea ā latou upu, 'E leai ma se āvanoa e toe talia āi Lino e se tasi o le aufa'atau penina, talu lana mea ua fai. Ua nofo lava Lino ia ma toe fa'a'umatia Lino.'

A o isi fo'i e manatu o Lino o se tagata e lototele, o sē e lē fefe. E sa'o Lino. E āogā lona toa mo tatou uma. O latou nei na femitai i le mea a Lino sa fai.

Na ta'oto Lino i luga o lona moega ma



mafaufau. Ua uma ona tanu lana penina i lalo o se ma'a i tafatafa o le ta'igaāfi, o lo'o tilotilo i mamana fesaua'i o lona fala moe ua sisiva nei i lona ūlu. Ua to'ese le tasi lalolagi ae leai se fa'aopoopo. Ua lagona lona fefe. E le'i ālu ese lava ma le mea o lo'o nofo āi. E lē masani i ni tagata ese ma ni nofoaga ese. E matuā ilitata o ia i lenei mea ese latou te fa'aigoa o le laumua. E tu i le isi itu o le vai ma mauga e ūia, e silia i se āfe maila. Ae peita'i ua leai se isi filifiliga. Auā o lana miti e moni lava, e lē mafai fo'i ona tineia e se isi.

'O le a ou ālu,' o lana upu lea.

Sa tilotilo Susana a o tanu e ia le penina, ua lē emo lana pupula ia Lino a o ia fa'ata'ele Penetino ma fafaga.

Na ūlufale Ioane Toma ma nofo āne i tafatafa o Lino e āunoa se tala e faia, se'ia tautala Lino. 'O le ā le isi ā'u mea e mafai? O ni tagata taufa'asesē.'

Na luelue le ūlu o Ioane Toma. O ia e matua, ma e fa'amoemoe Lino i lana fautuaga. 'E faigatā ona iloia,' o lana upu lea. 'Pau so'u iloia, na fa'asese mai lava tatou i le taimi na fananau āi e ō'o i le taimi e feoti āi. A o lea lava tatou te feola. E lē gata ua e foua le aufa'atau penina a o le mea atoa, le olaga o lo'o soifua āi, ma ua ōso āi lo'u popole mo oe.'

'O le ā le mea ou te fefe āi se'i vaganā le matelāina?' tali Lino.

A o Ioane Toma ua lūlū malie lona ūlu. 'Tatou te taufai fefefe uma lava i le mea lenā. Ae atonu e te sa'o—atonu e taugatā lau penina—fa'apea la oe ua gata āi le ta'aloga?'

'O le a le ūiga?'

'Ou te lē iloia,' o le tali lea a Ioane Toma, ae ou te popole ona o oe. O se la'asaga fou o le a e ūia, e te lē iloia le auala.'

'Ou te alu ā. E vave ona ou ālu,' o le tali lea a Lino.

'Lelei,' o Ioane Toma lea e lagolagoina. 'Fai le mea lenā. Pau lea, o le tulaga o le a tula'i mai i le laumua. E lelei inei o lea e fa'i āu uō ma ā'u, o lou uso. I 'o e leai se isi e te tapa i āi.'

'O le ā la'u mea a fai? o le melotagi lea a Lino. 'E tiga lo'u lotu, e tataua ona fa'i se āvanoa mo lo'u ātali'i. O le mea lenā o lo'o fa'asagatau mai āi i latou. O le a puipui ā'u e ā'u uō.'

'E leai se mea o fa'i, pau lea ia aua ne'i āfaina i latou pe lamatia āi,' o le tali lea a Ioane Toma. Ua tula'i ma fai ātu, 'Ia fa'atasi le Atua ma oe.'

Ua tali ātu fo'i Lino, 'Ia fa'atasi le Atua ma oe.' Na lagona e ia se malulu ese ua maniti āi lona tino i na upu na ia fai ātu.

fa'aauau i le itulau mulimuli (8)


UILI FAU UPU

Saili tali o fesili o lo’o i lalo. Pule oe pe sipela i luma (clockwise) po’o tua (anticlockwise). E sa le feosoosofa’i.

1. Ta’u mai ni soa se tolu o le fa’ata i le Igilisi:

2. Saili ni upu se 5 e faaiu i le tia

3. Su’e le upu ta’ata’a; tusi sona fa’amatalaga:



4. Tusi uma upu/ fuiupu e ta’i 4-8 mata’itusi, ma o latou soa i le Igilisi (E faitau ai ma upu ta’ua i le 1, 2 & 3)

Lelei atoa = 12 upu
Lelei tele = 8 upu
Lelei = 6 upu

SUDOKU #13 (TAALOGA I NUMERA)

				3		2	9	
		2	4		7			6
					1	7		4
				1		3	4	
4			3		6			2
	5	9		4				
2		6	1					
7			5		4	1		
	1	8		7				

FAIGOFIE / FEOLOOLO / FAIGATA

©sudokuessentials

Fa’atumu pusa numera (tama’i sikuea) i fuainumera 1 i le 9. Ia uma ane le galuega ua maua atulaina ta’itasi (tu, fa’alava) o iai le 1 i le 9. E tofu le atulaina ma lona fa’atulagaga e ese mai le isi.

TALI GALUEGA OLA 12

UILI FAU’UPU #12
1. lata—near; lata—close to; lata—close by lata—be tame
2. matamata, mataupu, matau, mata’i, matagaluega, matala
3. fa’amatala. Veape. faamanino pe faamalamalama se mataupu; faalautele e ala i se faata’ita’iga; talanoa i se mea sa tupu. E mafai ona e faamatala mai le mea na tupu?

Can you explain what happened?
4. faama—to shame, ridicule; faamata—to sharpen; faamata—likely; famatala—define; faa-matala—tell; faamatala—describe; faamatala—

1	5	8	6	4	9	2	7	3
6	2	4	7	3	5	8	9	1
9	7	3	1	2	8	6	4	5
5	1	7	4	8	3	9	6	2
3	9	6	2	5	7	4	1	8
4	8	2	9	1	6	5	3	7
2	3	9	8	6	1	7	5	4
7	4	5	3	9	2	1	8	6
8	6	1	5	7	4	3	2	9

TALI SUDOKU #10

explain; faamatala—to shuffle deck of cards; faamatala—to leave door/window ajar; falata—mule; tama—boy; tama—father; matala—open; matala—bloom; matala—on the loose (of animals)
TA’U MAI: E. 66 le aofa’i

M		A	T	I	M	A	R	I	A
A	L	A	T	A	N	S			
R	F	E	U	T	A	M	O	E	
E	S	I	L	E	I	A			
T	A	M	A	N	A	O	M	I	
A	O	O	F	A	R	S			
E	S	E	T	A	F	I	P	E	
R	E	U	A	U	E				
U	E	L	E	S	E	S	A	R	A
T	A	I	U	I	E				
A	S	U	V	A	I	A	F	A	I

TALI PASO #10

© PasoSamoa, 1988

PASO I GAGANA E LUA

Faatumu le paso i upu/igoa Samoa. Fill the crossword box with Samoan words/names

1		2		3		4		5		6
						7				
8								9		
						10				
11								12		
						13				
14			15		16			17	18	
		19					20			
21	22			23						
			24							
25						26				

- Faalava~Across

1 competition (7)

5 etched (in stone) (3)

7 merrily (3)

8 headscarf (7)

9 this (pron.)

10 simple, carefree (3)

11 total (7)

12 sleep (3)

13 seize (3)

14 point (2)

15 ferocious (4)

17 limp (3)

19 sunny (2)

21 hand (polite) (3)

23 city (7)

25 Culture: food losing
- team provides (5)

26 dead (polite) (5)

Lalo~Down

1 speech (9)

2 to cover (6)

3 daughter (7)

4 the day before (7)

5 sleeping mat (7)

6 host of angels (7)

15 hoarse (voice) (2)

16 attend (4)

18 look at (5)

19 Lord’s prayer: _ matou Tama e (2)

20 creek (4)


22 banyan tree (3)

24 play the violin (2)

Oe ma sau paga: Auaua’i: Fesili le tasi tali le isi. Taimi 1 le minute. Tusi pe ta’u le tali

Mataupu: Salamasina

- 0 ai le fafine na tausia Salamasina?
- 0 ai matua o Salamasina?
- 0 ai le alii na uo ma Salamasina?
- 0 ai na faaipoipo i ai Salamasina?
- 0 le a le isi pito (gafa) o Salamasina?





PASI ATU LA
TATOU PULETINI
I LE TOU A’OGA,
AIGA, LOU TUAOI,
AU UO, OU AIGA
I SAMOA MA NUU
MAMAO;

E AOGĀ MO LE
FANAU A’OGA

TALOSAGA: O le avanoa lenei e mafai ai
ona faailoa se tautua matavela a se susuga
(faia’oga) ua tuua le mafutaga ona o le maliu
po ua malolo foi mai le faiva; ma soo se tasi
lava o loo fai sona sao mo le fanau. Ae
mana’omia lau fesoasoani e faaoo mai ai se
ata ma se faamatalaga. Avea lena ma
faamau tumau mo latou e manatua ai.

www.ola888.com



ATI A'E UPU
e le o toe po se lilo. Vasega: fuiupu veape. Gagana. Valiata (pani)
Uiga—ua manino i le vaai, ua malamalama le uiga, ua iloa e tagata
uma se mea na tupu poo se tupua sa natia. Isi upu e fetala'i—lausilafia,
malamalama, manino, manino le mata o le vai, ma isi.

o le penina . . .

Ua leva ona âlu Ioane Toma a o Lino o lo’o âla pea ma mafaufau. Ua îfo ia te îa le fa’avaivai a o tau pipi’i âtu i le fa’amoemoe e foliga o le a sola. E peisea’i ua tapuni uma mai auala ia te îa. I lona ûlu ua toe âi na o le musika pogisā a le fili na te lagona âtu. O lo’o tau fai ma’ ai sulu o lona tino ae i lona mafaufau le âta o mea ua loa le masani âi, le taupule ma mafuta fa’atasi, o le meaâlofa a ôna tagata ia te îa. Ua tau lē lagona âtu leo masani o le po, le fetāgisi o manu, le taia ma le tu’umuli a tama’i âuma i le matāfaga, le ūū masani a le laolao.

Na te lagona âtu le manogi a’ala o limu ua âli i luga pe a pe le tai. Ua emo se ‘aloiafi e foliga ua ôso ese âi ma se mamanu mai le fala o lo’o ta’oto âi.

Ua tilotilo âtu Susana ia te îa ma le popole, a ua masani fo’i ia te îa, e sili âtu lona lē tautala i lo le fa’alavelave. E foliga fo’i ua îa lagona âtu le Pese a lē o Leaga, ua finau âtu fo’i i âi, e âla i lona ūsuina o le pese a le ‘āiga, le saogalemu ma le mafanafana e maua i âi.

Ua si’i â’e e îa Penetito i luga ma pese i âi, se’i tuli ese le leaga, o lona leo e toa i le finauga fa’asaga i le fa’amata’u a le musika pogisā.

E le’i gā’e Lino pe taunapa i lana mea’ ai. Ua maileia lana pupula, ua îa lagona âtu mata o lē o leaga o lo’o âutilo mai i fafo o le fale; ua na lagona âtu le mea pogisā taulamalama o lo’o fa’atalitali i le taimi e ûlufafo âi. E ûliûli ma tau fa’afefe, o lo’o talo mai ia te îa ma lu’i ma fa’amata’u mai. Na tu’u îfo lona lima i lona ofu ma lagona lana âgaese; ua ma’ ai lana pupula; ua tu ma savali âtu i le gutu o le faitoto’a.

E fa’aauau

Peni a le Tofa ia Popa

E leai se suiga tele i faamau o ausiga a le fanau (Niu Sila aoao) i se lipoti faavaomalo. Tumau pea le ava telē lena i le va o ausiga a le laualuga ma le laualalo. E le tau itea le pitolau o loo mafuli i ai nai tamaiti Maori ma Pasefika. Talofa e, a o se suasami fo’i pe a ua leai se masima, se’i loiloi ai fa’i. (E le aofia matagi, feoloolo nai isi a tatou tamaiti, ae moomia lava se faaleleiga atoa).

A o lo’u popolega aupito sili o le taimi e pelesetene ai Donald Duck Trump; ne’i faapea la e tuumamaina e Kim Jong Un o Kolea i Matu. Fai mai le upu, a lua vale i totonu o le taavale ua tupu le faalavelave. Ae fai mai fo’i le tala e fasa le vale ae taunuu. Pe taunuu i se lelei poo le malepe o le lalolagi, ia, talosia ia o se lelei.

Tala faaii o lena i le tama Ausetalia o Beau na suina le malo i le leaga o lana faitau. Fai mai Beau e tali le malo i le a’oga sa a’oga ai. Ia, e ono tula’i mai ni tagi se tele faapea i le lumana’i. Ae se’i ta’u atu le tali a le faamasino ia Piu i le vaiaso fou. Soifua.